

ENAKMEN PENTADBIRAN AGAMA ISLAM (NEGERI JOHOR) 2003
PEMBERITAHUAN FATWA DI BAWAH SUBSEKSYEN 48 (6)

FATWA ORANG ISLAM HADIR KE UPACARA
RITUAL PERAYAAN PENGANUT AGAMA BUKAN ISLAM

Pada menjalankan kuasa yang diberikan oleh seksyen 47 Enakmen Pentadbiran Agama Islam (Negeri Johor) 2003 [*Enakmen 16 Tahun 2003*], Jawatankuasa Fatwa Negeri Johor, atas perintah dan perkenan Duli Yang Maha Mulia Sultan, menyediakan fatwa yang dinyatakan di bawah untuk disiarkan menurut subseksyen 48 (6) Enakmen itu.

HUKUM UMAT ISLAM MENGHADIRI UPACARA RITUAL PERAYAAN KEAGAMAAN BUKAN ISLAM

1. Bahawa hukum umat Islam menghadiri upacara ritual perayaan keagamaan bukan Islam **adalah haram dan dilarang**. Upacara ritual keagamaan bukan Islam ini termasuklah di rumah ibadat mahu pun di tempat-tempat lain yang biasa dilaksanakan upacara ritual tersebut.
2. Umat Islam di Negeri Johor adalah **ditegah dan dilarang** daripada menghadiri, menyertai apatah lagi merayakan upacara ritual perayaan agama bukan Islam sama ada di rumah ibadat mereka atau di tempat-tempat perayaan mereka.

HUKUM MERAIKAN UNDANGAN ATAU JEMPUTAN KE MAJLIS SEMPENA PERAYAAN BUKAN ISLAM TANPA UPACARA RITUAL KEAGAMAAN

3. Hukum meraikan undangan atau jemputan ke majlis sempena perayaan bukan Islam tanpa upacara ritual keagamaan adalah **harus dan dibenarkan**. Contohnya majlis rumah terbuka atau majlis makan malam bersempena hari perayaan bukan Islam dan seumpamanya. Walau bagaimanapun, ia hendaklah mematuhi garis panduan yang ditetapkan oleh pihak berkuasa agama, sebagaimana di lampiran, bagi memastikan akidah umat Islam sentiasa terpelihara.

GARIS PANDUAN
ORANG ISLAM TURUT MERAYAKAN
HARI KEBESARAN AGAMA ORANG BUKAN ISLAM

Dalam menentukan perayaan orang bukan Islam yang boleh dihadiri oleh orang Islam beberapa kriteria utama perlu dijadikan garis panduan supaya ia tidak bertentangan dengan ajaran Islam. Kriteria-kriteria tersebut adalah seperti berikut;

1. Majlis tersebut tidak disertakan dengan upacara-upacara yang bertentangan dengan akidah Islam.

Maksud “bertentangan dengan akidah Islam” ialah sesuatu perkara, perbuatan, perkataan atau keadaan yang jika dilakukan menyebabkan tercemarnya akidah umat Islam. Contohnya;

- i. Menyertakan simbol-simbol agama seperti salib, memasang lampu, lilin, pokok krismas dan sebagainya.
 - ii. Menyanyikan lagu-lagu bercirikan agama.
 - iii. Meletakkan apa-apa tanda bercirikan agama pada dahi, atau tanda-tanda lain pada anggota tubuh.
 - iv. Memberikan ucapan atau isyarat yang berbentuk pujian kepada agama orang bukan Islam.
 - v. Tunduk atau melakukan perbuatan seolah-olah menghormati upacara agama orang bukan Islam.
2. Majlis tersebut tidak disertakan dengan perbuatan yang bertentangan dengan syarak.

Maksud “bertentangan dengan syarak” ialah sesuatu perkara, perbuatan, perkataan atau keadaan yang jika dilakukan akan bertentangan dengan ajaran Islam yang diamalkan oleh masyarakat Islam. Contohnya:

- i. Memakai pakaian berwarna merah seperti santa claus atau pakaian lain yang melambangkan agama;
- ii. Menghidangkan minuman atau makanan yang memabukkan dan seumpamanya;
- iii. Mengadakan bunyi-bunyian atau hiasan seperti loceng gereja, pokok krismas, kuil atau memecah kelapa;
- iv. Mengadakan acara yang berunsur perjudian, penyembahan, pemujaan, khurafat dan sebagainya.

3. Majlis tersebut tidak disertakan dengan perbuatan yang bercanggah dengan pembinaan akhlak dan budaya masyarakat Islam di negara ini.

Maksud “bercanggah dengan pembinaan akhlak dan budaya masyarakat Islam” ialah sesuatu perkara, perbuatan, perkataan atau keadaan yang jika dilakukan akan bertentangan dengan nilai dan norma kehidupan masyarakat Islam Negara ini yang berpegang kepada ajaran Islam berdasarkan Ahli Sunnah Wal Jamaah. Contohnya:

- i. Percampuran bebas tanpa batas dan adab sopan;
 - ii. Berpakaian yang menjolok mata;
 - iii. Mendendangkan lagu-lagu yang mempunyai senikata berunsur lucah serta pemujaan;
 - iv. Mengadakan program seperti pertandingan ratu cantik, laga ayam dan sebagainya.
4. Majlis tersebut tidak disertakan dengan perbuatan yang boleh menyentuh sensitiviti masyarakat Islam.

Maksud “menyentuh sensitiviti masyarakat Islam” ialah sesuatu perkara, perbuatan, perkataan atau keadaan yang jika dilakukan akan menyinggung perasaan umat Islam tentang kepercayaan dan amalan mereka. Contohnya:

- i. Ucapan-ucapan atau nyanyian berbentuk dakwah keagamaan bukan Islam;
 - ii. Ucapan-ucapan yang menghina umat Islam;
 - iii. Ucapan-ucapan yang menghina agama Islam;
 - iv. Persembahan yang bertujuan mempersendakan pegangan agama masyarakat Islam.
 - v. Karikatur atau animasi yang mempersendakan agama Islam.
5. Pihak penganjur dan orang ramai diminta mendapatkan pandangan pihak berkuasa agama sebelum menganjur atau menghadiri majlis perayaan orang yang bukan beragama Islam.

Bertarikh 28 Syaaban 1444 / 21 Mac 2023

[JMJ.351/04/01/6/63;PPUUNJ(R)600-1/5/8(39)]

Dengan Titah,

DATO' HAJI YAHYA BIN AHMAD
Mufti Negeri Johor

MOHD FARID BIN KASSIM
*Jurutulis Majlis Mesyuarat Kerajaan
Johor*